

看役工食各犯口糧等項亦在在需資各犯甫經習藝尙無貨物變價濟用暫就所屬州縣按月勻攤籌解俟貨價或罰錢等辦有成效卽行停止所習工藝略分粗細二項以織布巾並以機器製造鞋襪等類爲細工編織草蓆竹藍等類爲粗工各就地方銷路令工師體察各犯性質靈鈍分別專門教習並限定工作分設按日嚴行稽查獎勵罰惰俾免曠誤總期日起有功實事求是等情據福建按察使朱其煊核明詳請 奏咨並擬開辦章程八條聲明如有未盡事宜隨時酌辦前來臣查罪犯習藝所擬就各府州縣分設原恐不逞之徒聚集滋事茲據臬司所詳開辦伊始人犯無多自是實情察核所擬章程亦尙妥協應請先就各道開辦一俟人犯漸多再行設法推廣謹 奏奉 硃批刑部知道欽此

前署湖南巡撫端奏籌辦湘省罪犯習藝所情形摺

竊奴才於光緒三十一年四月二十四日承准軍機大臣字寄初三日奉 上諭翰林院撰文吳蔭培奏罪犯習藝所新章請責成各府州縣一律分設一摺著各直省督撫督飭各屬一體認真辦理原摺著抄給閱看將此各諭令知之欽此欽遵寄信前來奴才惟恆產恆心古人訓爲常生之業人以失業之故而絀於生因之而陷於罪哀矜勿喜所以憫既往之愆尤曲成不遺尤以見將來之希望奴才查伍廷芳等原奏內稱凡竊盜均令收所習藝按罪

輕重定以年限俾一技能嫻得以餬口自無再犯三犯之人仰蒙 依議施行如天之仁無所不覆敢不恪遵辦理以佐 生成查湘省自前撫臣趙爾巽擬設自新習藝所於省城係就局廠舊基擴充修葺規制極爲完備其中各項工藝如絡絲織縲成衣製帽造革鎔錫鈔書刻字彫竹作畫鑄石捲煙之屬均爲細工彈花織布編蒲削篾澆燭結繩斲木塗漆製傘糊燈之屬均爲粗工各就其才予以教授所有教習或常年定訂或臨時招致成績昭著出售豐饒至有並非罪犯而父兄求送子弟入所習藝者故省中一城之地習藝所收有二百數十名之多奴才蒞任湖湘竊歎其用心之勤收效之廣當經委派員紳分勸各屬做照辦理數月以來次第輟興略有基礎自經 明詔減罪釋囚 隆恩稠疊奴才復加檄飭各府廳州縣限一箇月之內所辦習藝所罪犯姓名事由列冊詳報自五月初一日爲始至三十日止先後稟報到署者計長沙府屬已辦者七縣罪犯八十六名寶慶府屬已辦者兩縣罪犯十三名衡州府屬已辦者四縣罪犯三十四名永州府屬已辦者四縣罪犯三十名郴州直隸州並所屬已辦者一州五縣罪犯五十一名岳州府屬已辦者二縣罪犯二十一名常德府屬已辦者三縣罪犯二十名澧州直隸州並所屬已辦者一州二縣罪犯四十二名辰州府屬已辦者三縣罪犯二十一名沅州府屬已辦者二縣罪犯十五名永順府屬已辦者

三縣罪犯二十一名奴才復密飭該管司道確查據稱雖事屬草創經費不充人數無幾而各屬尙知振刷精神力圖推廣此奴才遵 旨籌辦實在情形既不容略涉延擱自負初心亦不敢稍事鋪張上渚 聰聽者也又近准學務處咨開通飭各省府廳州縣編輯鄉土志凡物產工商各端詳細開列以爲各學堂考鏡之資奴才擬卽責成各該地方官就鄉土志所列之品物工業令該所罪犯學習製造分門呈驗庶可以暢百貨之銷流興一方之實業習成而後就地方取材因工覓食尤爲便利矣謹 奏奉 硃批該衙門知道欽此

湖南熊庶常希齡上前撫端考察醴陵磁業書

竊查醴陵磁土最富產地甚多如瀛山赤足嶺青泥灣老鴉山茶子山唐山口鄧家渡等共有七處而以瀛山之土質爲良山又分爲上中下三段窰戶六十餘家每家年出磁器價值洋三千餘元六十餘家共二十餘萬元合他六處統計該縣共歲產磁產洋三四十餘萬元實爲大宗入款惟磁器粗陋僅供下級貧民購用近年以來土貨滯銷窰戶賠累幾至歇業皆有岌岌不可終日之勢推求其故厥有數因一各窰戶資本不足每家母財不過數百串錢難以延請上等工人製造新式二採取磁土毫無規則率皆爭挖浮土捷足先得未能深入故多雜以黃泥等質三磁土未能漂細每石百斤只用水洗去一二成所留八成實餘粗